

মেঘনাদবধ কাব্য মাইকেল মধুসূদন দত্ত

দ্বিতীয় সর্গ

২০ মে ২০০৬ (শেষ পরিবর্তন: ১৪ জুন ২০০৬)
<http://www.iopb.res.in/~somen/madhu.html>

দ্বিতীয় সর্গ

অস্ত্রে গেল দিনমণি; আইলা গোধূলি,—
একটি রতন ভালে। ফুটিলা কুমুদী;
মুদীলা সরসে আঁখি বিরসবদনা
নলিনী; কুজনি পাখী পশিল কুলায়ে;
গোষ্ঠ-গৃহে গাভী-বৃন্দ ধায় হাষা রবে।
আইলা সুচারু-তারা শশী সহ হাসি,
শর্বরী; সুগন্ধবহ বহিল চৌদিকে,
সুস্বনে সবার কাছে কহিয়া বিলাসী,
কোন্ কোন্ ফুল চুম্বি কি ধন পাইলা।
আইলেন নিদ্রা দেবী; ক্লান্ত শিশুকুল
জননীর ক্রোড়-নীড়ে লভয়ে যেমতি
বিরাম, ভূচর সহ জলচর-আদি
দেবীর চরণাশ্রমে বিশ্রাম লভিলা।
উতরিলা শশিপ্রিয়া ত্রিদশ-আলয়ে।
বসিলেন দেবপতি দেবসভা মাঝে,
হৈমাসনে; বামে দেবী পুলোম-নন্দিনী
চারুনেত্রী। রজ-ছত্র, মণিময় আভা,
শোভিল দেবেন্দ্র-শিরে। রতনে খচিত
চামর যতনে ধরি, ঢুলায় চামরী।
আইলা সুসমীরণ, নন্দন-কানন-
গন্ধমধু বহি রঞ্জে। বাজিল চৌদিকে
ত্রিদিব-বাদিত্র। ছয় রাগ, মূর্তিমতী

ছত্রিশ রাগিণী সহ, আসি আরম্ভিলা
সঙ্গীত। উর্বশী, রত্না সুচারুহাসিনী,
চিত্রলেখা, সুকেশিনী মিশ্রকেশী, আসি
নাচিলা, শিঞ্জিতে রঞ্জি দেব-কুল-মনঃ!
যোগায় গন্ধর্ব স্বর্ণ-পাত্রে সুধারসে।
কেহ বা দেব-ওদন; কুঙ্কুম, কস্তুরী,
কেশর বহিছে কেহ; চন্দন কেহ বা;
সুগন্ধ মন্দার-দাম গাঁথি আনে কেহ।
বৈজয়ন্ত-ধামে সুখে ভাসেন বাসব
ত্রিদিব-নিবাসী সহ; হেন কালে তথা,
রূপের আভায় আলো করি সুর-পুরী
রক্ষঃ-কুল-রাজলক্ষ্মী আসি উতরিলা।

সসম্ভ্রমে প্রণমিলা রমার চরণে
শচীকান্ত। আশীষিয়া হৈমাসনে বসি,
পদ্মাক্ষী পুণ্ডরীকাক্ষ-বক্ষোনিবাসিনী
কহিলা; “হে সুরপতি, কেন যে আইনু
তোমার সভায় আজি, শুন মন দিয়া।”

উত্তর করিলা ইন্দ্র; “হে বারীন্দ্র-সুতে,
বিশ্বরমে, এ বিশ্বে ও রাঙা পা দুখানি
বিশ্বের আকাঙ্খা মা গো! যার প্রতি তুমি,
কৃপা করি, কৃপা-দৃষ্টি কর, কৃপাময়ি,
সফল জনম তারি! কোন্ পুণ্য-ফলে,
লভিল এ সুখ দাস, কহ, মা দাসেরে?”

কহিলেন পুনঃ রমা, “বহুকালাবধি
আছি আমি, সুরনিধি, স্বর্ণ-লঙ্কাধামে।
পূজে মোরে রক্ষো রাজ! হয়, এত দিনে
বাম তার প্রতি বিধি! নিজ কর্ম-দোষে,
মজিছে সবংশে পাপী; তবুও তাহারে
না পারি ছাড়িতে, দেব। বন্দী যে, দেবেন্দ্র,
কারাগার-দ্বার নাহি খুলিলে কি কভু
পারে সে বাহির হতে? যত দিন বাঁচে
রাবণ, থাকিব আমি বাঁধা তার ঘরে।
মেঘনাদ নামে পুত্র, হে বৃত্রবিজয়ি,
রাবণের, বিলক্ষণ জান তুমি তারে।
একমাত্র বীর সেই আছে লঙ্কাধামে।
এবে; আর বীর যত, হত এ সমরে।
বিক্রম-কেশরী শূর আক্রমিবে কালি
রামচন্দ্রে; পুনঃ তারে সেনাপতি-পদে
বরিয়াকে দশানন। দেব-কুল-প্রিয়
রাঘব; কেমনে তারে রাখিবে, তা দেখ।
নিকুন্ডিলা যজ্ঞ সাঙ্গ করি, আরন্ডিলে
যুদ্ধ দস্তী মেঘনাদ, বিষম সঙ্কটে
ঠেকিবে বৈদেহীনাথ, কহিনু তোমারে।
অজেয় জগতে মন্দোদরীর নন্দন,
দেবেন্দ্র! বিহঙ্গকুলে বৈনতেয় যথা
বল-জ্যেষ্ঠ, রক্ষঃ-কুল-শ্রেষ্ঠ শূরমণি!”

এতেক কহিয়া রমা কেশব-বাসনা
নীরবিলা; আহা মরি, নীরবে যেমতি
বীণা, চিত্ত বিনোদিয়া সুমধুর নাদে!
ছয় রাগ, ছত্রিশ রাগিণী আদি যত,
শুনি কমলার বাণী, ভুলিলা সকলে
স্বকর্ম; বসন্তকালে পাখীকুল যথা,
মুঞ্জরিত কুঞ্জে, শুনি পিকবর-ধনি।

কহিলেন স্বরীশ্বর; “এ ঘোর বিপদে,
বিশ্বনাথ বিনা, মাতঃ, কে আর রাখিবে
রাঘবে? দুর্বীর রণে রাবণ-নন্দন।
পন্নগ-অশনে নাগ নাহি ডরে যত,
ততোধিক ডরি তারে আমি! এ দঙেলি,
বৃত্রাসুর-শিরঃ চূর্ণ যাহে, বিমুখয়ে
অস্ত্র-বলে মহাবলী; তেঁই এ জগতে
ইন্দ্রজিৎ নাম তার। সর্বশুচি-বরে
সর্বজয়ী বীরবর। দেহ আজ্ঞা দাসে,
যাই আমি শীঘ্রগতি কৈলাস-সদনে।”

কহিলা উপেন্দ্র-প্রিয়া বারীন্দ্রনন্দিনী;—
“যাও তবে সুরনাথ, যাও স্বরা করি।
চন্দ্র-শেখরের পদে, কৈলাস-শিখরে,
নিবেদন কর, দেব, এ সব বারতা।
কহিও সতত কাঁদে বসুন্ধরা সতী,
না পারি সহিতে ভার; কহিও, অনন্ত,
ক্লাস্ত এবে। না হইলে নির্মূল সমূলে
রক্ষঃপতি, ভবতল রসাতলে যাবে।
বড় ভাল বিরূপাক্ষ বাসেন লক্ষ্মীরে।
কহিও, বৈকুণ্ঠপুরী বহু দিন ছাড়ি
আছয়ে সে লঙ্কাপুরে! কত যে বিরলে
ভাবয়ে সে অবিরল, এক বার তিনি,
কি দোষ দেখিয়া, তারে না ভাবেন মনে?
কোন পিতা দুহিতারে পতি-গৃহ হতে
রাখে দূরে — জিজ্ঞাসিও, বিজ্ঞ জটাধরে!
ত্র্যম্বকে না পাও যদি, অম্বিকার পদে
কহিও এ সব কথা।” — এতেক কহিয়া,
বিদায় হইয়া চলি গেলা শশিমুখী
হরিপ্রিয়া। অনন্তর-পথে সুকেশিনী,
কেশব-বাসনা দেবী গেলা অধোদেশে।
সোনার প্রতিমা, যথা! বিমল সলিলে
ডুবে তলে জলরাশি উজলি স্বতেজে।

আনিলে মাতলি রথ, চাহি শচী পানে
কহিলেন শচীকান্ত মধুর বচনে
একান্তে; “চলহ, দেবি, মোর সঙ্গে তুমি।
পরিমল-সুধা সহ পবন বহিলে,
দ্বিগুণ আদর তার! মৃগালের রুচি
বিকচ কমল-গুণে, শুন লো ললনে।”
শুনি প্রণয়ীর বাণী, হাসি নিতম্বিনী,
ধরিয়া পতির কর, আরোহিলা রথে।

স্বর্গ-হৈম-দ্বারে রথ উতরিল স্বরা।
আপনি খুলিল দ্বার মধুর নিনাদে
অমনি! বাহিরি বেগে, শোভিল আকাশে।
দেবযান, সচকিতে জগত জাগিলা,
ভাবি রবিদেব বুঝি উদয়-অচলে
উদিল। ডাকিলা ফিঙা, আর পাখী যত
পূরিল নিকুঞ্জ-পুঞ্জ প্রভাতী সঙ্গীতে!
বাসরে কুসুম-শয্যা ত্যজি লজ্জাশীলা
কুলবধু, গৃহ কার্য উঠিলা সাধিতে।

মানস-সকাশে শোভে কৈলাস শিখরী
আভাময়, তার শিরে ভবের ভবন।
শিখী-পুচ্ছ-চূড়া যেন মাধবের শিরে।
সুশ্যামাঙ্গ শৃঙ্গধর, স্বর্ণ-ফুল-শ্রেনী
শোভে তাহে, আহা মরি পীত ধড়া যেন।
নির্বর-বরিত-বারি-রাশি স্থানে স্থানে-
বিশদ চন্দনে যেন চর্চিত সে বপু!

ত্যজি রথ, পদব্রজে, সহ স্বরিশ্বরী,
প্রবেশিলা স্বরীশ্বর আনন্দ-ভবনে।
রাজরাজেশ্বরী-রূপে বসেন ঈশ্বরী
স্বর্ণাসনে, ঢুলাইছে চামর বিজয়া,
ধরে রাজহুত্র জয়া। হায় রে, কেমনে,
ভবভবনের কবি বর্ণিবে বিভব?
দেখ, হে ভাবুক জন, ভাবি মনে মনে!

পূজিলা শক্তির পদ মহাভক্তি ভাবে
মহেন্দ্র ইন্দ্রাণী সহ। আশীষি অম্বিকা
জিজ্ঞাসিলা;—“কহ, দেব, কুশল বারতা,—
কি কারণে হেথা আজি তোমা দুই জনে?”
কর-জোড়ে আরঙিলা দম্ভোলি-নিষ্ফেপী;—
“কি না তুমি জান, মাতঃ, অখিল জগতে?
দেবদ্রোহী লঙ্কাপতি, আকূল বিগ্রহে,
বরিয়াছে পুনঃ পুত্র মেঘনাদে আজি
সেনাপতি-পদে? কালি প্রভাতে কুমার
পরম্প্র প্রবেশিবে রণে, ইষ্টদেবে
পূজি, মনোনীত বর লভি তার কাছে।
অবিদিত নহে মাতঃ, তার পরাক্রম।
রক্ষঃ-কুল-রাজলক্ষ্মী, বৈজয়ন্ত-ধামে
আসি, এ সংবাদ দাসে দিলা, ভগবতী।
কহিলেন হরিপ্রিয়া, কাঁদে বসুন্ধরা,
এ অসহ ভার সতী না পারি সহিতে;
ক্লান্ত বিশ্বধর শেষ; তিনিও আপনি
চঞ্চলা সতত এবে ছাড়িতে কনক-
লঙ্কাপুরী। তব পদে এ সংবাদ দেবী
আদেশিলা নিবেদিতে দাসেরে, অম্মদে!
দেব-কুল-প্রিয় বীর রঘু-কুল-মণি।
কিন্তু দেবকূলে হেন আছে কোন্ রথী
যুঝিবে যে রণ-ভূমে রাবণির সাথে?
বিশ্বনাশী কুলিশে, মা, নিস্তেজে সমরে
রাক্ষস, জগতে খ্যাত ইন্দ্রজিত নামে!
কি উপায়ে, কাত্যায়নি, রক্ষিবে রাঘবে,
দেখ ভাবি। তুমি কৃপা না করিলে, কালি
অরাম করিবে ভব দুরন্ত রাবণি।”

উত্তরিলা কাত্যায়নী;—“শৈব-কুলোত্তম
নৈকেষ্যে, মহা স্নেহ করেন ত্রিশূলী
তার প্রতি, তার মন্দ, হে সুরেন্দ্র, কভু
সম্ভবে কি মোর হতে? তবে মগ্ন এবে
তাপসেন্দ্র, তেঁই, দেব, লঙ্কার এ গতি।”

কৃতাজ্জলি-পুটে পুনঃ বাসব কহিলা;—
 “পরম-অধর্মাচরী নিশাচর-পতি—
 দেব-দ্রহী! আপনি, যে নগেন্দ্র-নন্দিনি,
 দেখ বিবেচনা করি। দরিদ্রের ধন
 হরে যে দুর্মতি, তব কৃপা তার প্রতি
 কভু কি উচিত, মাতঃ? সুশীল রাঘব,
 পিতৃ-সত্য-রক্ষা-হেতু, সুখ-ভোগ ত্যজি
 পশিল ভিখারী-বেশে নিবিড় কাননে।
 এটি রতনমাত্র তাহার আছিল
 অমূল; যতন কত করিত সে তারে,
 কি আর কহিব দাস? সে রতন, পাতি
 মায়াজাল, হরে দুষ্টি, হায়, মা, স্বরিলে
 কোপানলে দহে মনঃ! ত্রিশূলীর বরে
 বলী রক্ষঃ, তৃণ-জ্ঞান করে দেব-গণে!
 পর-ধন, পর-দার লোভে সদা লোভী
 পামর। তবে যে কেন (বুঝিতে না পারি)
 হেন মুঢ়ে দয়া কর, দয়াময়ি?”

নীরবিলা স্বরীশ্বর; কহিতে লাগিলা
 বিণাবাণী স্বরীশ্বরী; কহিতে লাগিলা
 “বৈদেহীর দুঃখে দেবি, কার না বিদরে
 হৃদয়? অশোক-বনে বসি দিবা নিশি
 (কুঞ্জবন-সখী পাখী পিঞ্জরে যেমতি)
 কাঁদেন রূপসী শোকে! কি মনোবেদনা
 সহেন বিধুবদনা পতির বিহনে,
 ও রাঙা চরণে, মাতঃ, অবিদিত নহে।
 আপনি না দিলে দণ্ড, কে দণ্ডিবে, দেবি,
 এ পাষণ্ড রক্ষোনাথে? নাশি মেঘনাদে,
 দেহ বৈদেহীরে পুনঃ বৈদেহীরঞ্জে;
 দাসীর কলঙ্ক ভঞ্জ, শশাঙ্কধারিণি!
 মরি, মা, শরমে আমি, শূনি লোকমুখে,
 ত্রিদিব-ঈশ্বরে রক্ষঃ পরাভাবে রণে।”

হসিয়া কহিলা উমা; “রাবণের প্রতি
 দ্বেষ তব, জিষ্ণু! তুমি, হে মঞ্জুনাশিনী
 শচি, তুমি ব্যগ্র ইন্দ্রজিতের নিধনে।
 দুই জন অনুরোধ করিছ আমারে
 নাশিতে কনক-লঙ্কা। মোর সাধ্য নহে
 সাধিতে এ কার্য। বিরূপাক্ষের রক্ষিত
 রক্ষঃকুল; তিনি বিনা তব এ বাসনা,
 বাসব, কে পারে, কহ, পূর্ণিতে জগতে?
 যোগে মগ্ন, দেবরাজ, বৃষধজ আজি।
 যোগাসন নামে শৃঙ্গ, মহাভয়ঙ্কর,
 ঘন ঘনাবৃত, তথা বসেন বিরলে
 যোগীন্দ্র। কেমনে যাবে তাঁহার সমীপে?
 পক্ষীন্দ্র গরুড় সেথা উড়িতে অক্ষম!”

কহিলা বিনত-ভাবে অদিতিনন্দন;—
 “তোমা বিনা কার শক্তি, হে মুক্তি-দায়িনি
 জগদম্বু, জায় যে সে যথা ত্রিপুরারি
 ভৈরব? বিনাশি, দেবি, রক্ষঃকুল, রাখ
 ত্রিভুবন; বৃদ্ধি কর ধর্মের মহিমা,
 ভ্রাসো বসুধার ভার, বসুধরাধর
 বাসুকিরে কর স্থির; বাঁচাও রাঘবে।”
 এইরূপে দৈত্য-রিপু স্তুতিলা সতীরে।

হেন কালে গন্ধামোদে সহসা পুরিল
 পুরী; শঙ্খঘণ্টাধনি বাজিল চৌদিকে
 মঞ্জল নিষ্কণ সহ, মৃদু যথা যবে
 দূর কুঞ্জবনে গাহে পিককুল মিলি।
 টলিল কনকাসন! বিজয়া সখীরে
 সম্ভাষিয়া মধুস্বরে, ভবেশ-ভাবিনী
 শূধিলা, “লো বিধুমুখি, কহ শীঘ্র করি,
 কে কোথা, কি হেতু মোরে পূজিছে
 অকালে?”

মন্ত্র পড়ি, খড়ি পাতি, গণিয়া গণনে,
 নিবেদিলা হাসি সখী; “হে নগনন্দিনি,
 দাশরথি রথী তোমা পূজে লঙ্কাপুরে।
 বারি-সংঘটিত-ঘটে, সুসিন্দুরে আঁকি
 ও সুন্দর পদযুগ, পূজে রঘুপতি,
 নীলোৎপলাঞ্জলি দিয়া, দেখিনু গণনে।
 অভয়-প্রদান তারে কর গো, অভয়ে।
 পরম ভকত তব কৌশল্যা-নন্দন
 রঘুশ্রেষ্ঠ; তার তারে বিপদে, তারিণি!”
 কাণ্ডন-আসন ত্যজি, রাজরাজেশ্বরী
 উঠিয়া, কহিল পুনঃ বিজয়ারে সতী;—
 “দেব-দম্পতিরে তুমি সেব যথা বিধি,
 বিজয়ে। যাইব আমি যথা যোগাসনে
 (বিকটশিখর।) এবে বসেন ধূর্জটি।”
 এতেক কহিয়া দুর্গা দ্বিরদ-গামিনী
 প্রবেশিলা হৈম গেহে। দেবেন্দ্র বাসবে
 ত্রিদিব-মহিষী সহ, সন্ধ্যাষি আদরে,
 স্বর্ণাসনে বসাইলা বিজয়া সুন্দরী।
 পাইলা প্রসাদ দৌহে পরম-আল্লাদে।
 শচীর গলায় জয়া হাসি দোলাইলা
 তারাকারা ফুলমালা, কবরী-বন্ধনে
 বসাইলা চিররুচি, চির-বিকচিত
 কুসুম-রতন-রাজী, বাজিল চৌদিকে
 যন্ত্রদল, বামাদল গাইল নাচিয়া
 মোহিল কৈলাসপুরী, ত্রিলোক মোহিল।
 স্বপনে শুনিয়া শিশু সে মধুর ধনি,
 হাসিল মায়ের কোলে, মুদিত নয়ন।
 নিদ্রাহীন বিরহিণী চমকি উঠিলা,
 ভাবি প্রিয়-পদ-শব্দ শুনিলা ললনা
 দুয়ারে। কোকিলকুল নীরবিল বনে।
 উঠিলেন যোগীরাজ, ভাবি ইষ্টদেব,
 বর মাগ বলি, আসি দরশন দিলা।

প্রবেশি সুবর্ণ-গেহে, ভবেশ-ভাবিনী
 ভাবিলা, “কি ভাবে আজি ভেটিব ভবেশে?”
 ক্ষণ কাল চিন্তি সতী চিন্তিলা রতিরে।
 যথায় মন্মথ-সাথে, মন্মথ-মোহিনী
 বরাননা, কুঞ্জবনে বিহারিতেছিলে,
 তথায় উমার ইচ্ছা, পরিমলময়-
 বায়ু তরঙ্গিণী-রূপে বহিল নিমিষে।
 নাচিল রতির হিয়া বীণা-তার যথা
 অঞ্জুলির পরশনে। গেলা কামবধু,
 দ্রুতগতি বায়ুপথে, কৈলাস-শিখরে।
 সরসে নিশান্তে যথা ফুটি, সরোজিনী
 নমে স্থিষাম্পতি-দূতী উষার চরণে,
 নমিলা-মদন-প্রিয়া হরপ্রিয়া-পদে।
 আশিষি রতিরে, হাসি কহিলা অম্বিকা,- —
 “যোগাসনে তপে মগ্ন যোগীন্দর, কেমনে,
 কোন্ রঙ্গে, ভগ্ন করি তাঁহার সমাধি,
 কহ মোরে, বিধুমুখি?” উত্তরিলা নমি
 সুকেশিনী,- “ধর, দেবি, মোহিনী মূরতি।
 দেহ আঞ্জা, সাজাই ও বর বপুঃ, আনি
 নান আভরণ, হেরি যে সবে, পিনাকী
 ভুলিবেন, ভুলে যথা ঋতুপতি, হেরি
 মধুকালে বনস্থলী কুসুম-কুন্তলা।
 এতেক কহিয়া রতি, সুবাসিল তেলে
 মাজি চুল, বিনানিলা মনোহর বেণী।
 যোগাইলা আনি ধনী বিবিধ ভূষণে,
 হীরক, মুকুতা, মণি-খচিত, আনিলা
 চন্দন, কেশর সহ কুঙ্কুম, কঙ্কুরী;
 রত্ন-সঙ্কলিত-আভা কৌষেয় বসনে।
 লাম্কারসে পাদুখানি চিত্রিলা হরষে
 চারুনেত্র। ধরি মূর্তি ভুবনমোহিনী,
 সাজিলা নগেন্দ্র-বালা, রসানে মার্জিত
 হেম-কান্তি-সম কান্তি দ্বিগুণ শোভিল।

হেরিলা দর্পণে দেবী ও চন্দ্র-আননে,
 প্রফুল্ল নলিনী যথা বিমল সলিলে
 নিজ-বিকচিত-রুচি। হাসিয়া কহিলা,
 চাহি স্বর-হর-প্রিয়া স্বর-প্রিয়া পানে; —
 “ডাক তব প্রাণনাথে।” অমনি ডাকিলা
 (পিককুলেশ্বরী যথা ডাকে ঋতুবরে!)
 মদনে মদন-বাঁহা। আইলা ধাইয়া
 ফুল-ধনুঃ, আসে যথা প্রবাসে প্রবাসী,
 স্বদেশ-সঙ্গীত-ধনি শুনি রে উল্লাসে!
 কহিলা শৈলেশসুতা; “চল মোর সাথে,
 হে মমথ, যাব আমি যথা যোগীপতি
 যোগে মগ্ন এবে; বাছা, চল স্বরা করি।”
 অভয়ার পদতলে মায়ার নন্দন,
 মদন আনন্দময়, উত্তরিলে ভয়ে,—
 “হেন আজ্ঞা কেন, দেবি, কর এ দাসেরে?
 ঋরিলে পূর্বের কথা, মরি, মা, তরাসে!
 মূঢ় দক্ষ-দোষে যবে দেহ ছাড়ি, সতি
 হিমাঙ্গির গৃহে জন্ম গ্রহিলা আপনি,
 তোমার বিরহ-শোকে বিশ্ব-ভার ত্যজি
 বিশ্বনাথ, আরঙিলা ধ্যান, দেবপতি
 ইন্দ্র আদেশিলা দাসে সে ধ্যান ভাঙিতে,
 কুলগ্নে গেনু, মা, যথা মগ্ন বামদেব
 তপে; ধরি ফুল-ধনুঃ, হানিনু কুক্ষণে
 ফুল-শর। যথা সিংহ সহসা আক্রমে
 গজরাজে, পুরি বন ভীষণ গর্জনে,
 গ্রাসিলা দাসেরে আসি রোষে বিভাবসু,
 বাস যাঁর, ভবেশ্বর, ভবেশ্বর-ভালে।
 হায়, মা, কত যে জ্বালা সহিনু, কেমনে
 নিবেদি ও রাঙা পায়ে? হাহাকার রবে,
 ডাকিনু বাসবে, চন্দ্রে, পবনে, তপনে;
 কেহ না আইল; ভস্ম হইনু সত্বরে!—
 ভয়ে ভগ্নোদ্যম আমি ভাবিয়া ভবেশে;—
 ক্ষম দাসে, ক্ষেমক্ষরি! এ মিনতি পদে!”

আশ্বাসি মদনে, হাসি কহিলা শঙ্করী;—
 “চল রঞ্জে মোর সঙ্গে নির্ভয় হৃদয়ে,
 অনঙ্গ। আমার বরে চিরজয়ী তুমি!
 যে অগ্নি কুলগ্নে তোমা পাইয়া স্বতেজে
 জ্বালাইল, পূজা তব করিবে সে আজি,
 ঔষধের গুণ ধরি, প্রাণ-নাশ-কারী
 বিষ যথা রক্ষি প্রাণ বিদ্যার কৌশলে!”

প্রণমিয়া কাম তবে উমার চরণে,
 কহিলা, “অভয় দান কর যারে তুমি,
 অভয়ে, কি ভয় তার এ তিন ভুবনে?
 কিন্তু নিবেদন করি ও কমল-পদে;—
 কেমনে মন্দির হতে, নগেন্দ্র-নন্দিনি,
 বাহিরিবা, কহ দাসে, এ মোহিনী-বেশে?
 মুহূর্তে মাতিবে, মাতঃ, জগত, হেরিলে
 ও রূপ-মাধুরী, সত্য কহিনু তোমারে।
 হিতে বিপরীত, দেবি, সত্বরে ঘটিবে।
 সুরাসুর-বৃন্দ যবে মথি জলনাথে,
 লাভিলা অমৃত, দুষ্টি দিতিসুত যত
 বিবাদিল দেব সহ সুধামধু-হেতু।
 মোহিনী মুরতি ধরি আইলা স্ত্রীপতি।
 ছদ্মবেশী হৃষীকেশে ত্রিভুবন হেরি,
 হারাইলা জ্ঞান সবে এ দাসের শরে!
 অধর-অমৃত আশে ভুলিল অমৃত
 দেব-দৈত্য, নাগদল নম্রশিরঃ লাজে,
 হেরি পৃষ্ঠদেশে বেণী, মন্দর আপনি
 অচল হইল হেরি উচ্চ কূচ-যুগে!
 ঋরিলে সে কথা, সতি, হাসি আসে মুখে।
 মলয়া অস্বরে তাম্র এত শোভা যদি
 ধরে, দেবি, ভাবি দেখ বিশুদ্ধ কাণ্ডন-
 কান্তি কত মনোহর!” অমনি অম্বিকা,
 সুবর্ণ বরণ ঘন মায়ায় সৃজিয়া,
 মায়াময়ী, আবারিলা চারু অবয়বে।

হায় রে, নলিনী যেন দিবা-অবসানে
ঢাকিল বদনশশী! কিম্বা অগ্নিশিখা,
ভস্মরাশি মাঝে পশি, হাসি লুকাইলা!
কিম্বা সুধা-ধন যেন, চক্র-প্রসরণে,
বেড়িলেন দেব শত্রু সুধাংশু-মণ্ডলে!

দ্বিরদ-রদ-নির্মিত গৃহদ্বার দিয়া
বাহিরিলা সুহাসিনী, মেঘাবৃত্তা যেন
উষা! সাথে মম্বথ, হাতে ফুল-ধনুঃ,
পৃষ্ঠে তুণ, খরতর ফুল-শরে ভরা-
কণ্টকময় মৃগালে ফুটিল নলিনী।

কৈলাস-শিখরি-শিরে ভীষণ শিখর
ভৃগুমান, যোগাসন নামেতে বিখ্যাত
ভুবনে; তথায় দেবী ভুবন-মোহিনী
উতরিলা গজগতি। অমনি চৌদিকে
গভীর গহ্বরে বন্ধ, ভৈরব নিনাদী
জলদল নীরবিলা জল-কান্ত যথা
শান্ত শান্তিসমাগমে, পলাইল দূরে
মেঘদল, তমঃ যথা উষার হসনে!
দেখিলা সম্মুখে দেবী কপদী তপসী,
বিভূতি-ভূষিত দেহ, মুদিত নয়ন,
তপের সাগরে মগ্ন, বাহ্য-জ্ঞান-হত।

কহিলা মদনে হাসি সুচারুহাসিনী;—
“কি কাজ বিলম্বে আর, হে শয়র-অরি?
হান তব ফুল-শর।” দেবীর আদেশে
হাঁটু পাড়ি মীনধজ, শিজিণী টঙ্কারি,
সম্মোহন-শরে শূর বিঁধিলা উমেশে!
শিহরিলা শূলপাণি! লড়িল মস্তকে
জটাজুট তরুরাজী যথা গিরিশিরে।
ঘোর মড় মড় রবে লড়ে ভুকম্পনে।
অধীর হইলা প্রভু! গরজিলা ভালে
চিত্রভানু, ধকধকি উজ্জল জ্বলনে!

ভয়াকুল ফুল-ধনুঃ পশিলা অমনি
ভবানীর বক্ষঃ-স্থলে, পশয়ে যেমতি
কেশরী-কিশোর ত্রাসে, কেশরিণী-কোলে,
গভীর নির্ঘোষে ঘোষে ঘনদল যবে,
বিজলী ঝলসে আঁখি কালানল তেজে!
উন্মীলি নয়ন এবে উঠিলা ধূর্জটি।
মায়া-ঘন-আবরণ ত্যজিলা গিরিজা।

মোহিত মোহিনীরূপে, কহিলা হরষে
পশুপতি, “কেন হেথা একাকিনী দেখি,
এ বিজন স্থলে, তোমা, গণেন্দ্রজননি?
কোথায় মুগেন্দ্র তব কিঙ্কর, শঙ্করি?
কোথায় বিজয়া, জয়া?” হাসি উত্তরিলা
সুচারুহাসিনী উমা, “এ দাসীরে, ভুলি,
হে যোগীন্দ্র, বহু দিন আছ এ বিরলে;
তঁই আসিয়াছি, নাথ, দরশন-আশে
পা দুখানি। যে রমণী পতি পরায়ণা,
সহচরী সহ সে কি যায় পতি-পাশে?
একাকী প্রত্যাশে, প্রভু, যায় চক্রবাকী
যথা প্রাণকান্ত তার!” আদরে ঈশান,
ঈষৎ হাসিয়া দেব, অর্জিন-আসনে
বসাইলা ঈশানীরে। অমনি চৌদিকে
প্রফুল্লিল ফুলকুল; মকরন্দ-লোভে
মাতি শিলীমুখবন্দ আইল ধাইয়া;
বহিল মলয়-বায়ু, গাইল কোকিল;
নিশার শিশিরে ধৌত কুসুম-আসার
আচ্ছাদিল শৃঙ্গবরে। উমার উরসে
(কি আর আছে রে বাসা সাজে মনসিজে
ইহা হতে!) কুসুমেশু, বসি কুতূহলে,
হানিলা, কুসুম-ধনুঃ টঙ্কারি কৌতুকে
শর-জাল;—প্রেমামোদে মাতিলা ত্রিশূলী!
লজ্জা-বেশে রাহু আসি গ্রাসিল চাঁদরে,
হাসি ভস্মে লুকাইলা দেব বিভাবসু!

মোহন মুরতি ধরি, মোহি মোহিনীরে
কহিলা হাসিয়া দেব; “জানি আমি, দেবি,
তোমার মনের কথা,—বাসব কি হেতু
শচী সহ আসিয়াছে কৈলাস-সদনে,
কেন বা অকালে তোমা পূজে রঘুমণি?
পরম ভকত মম নিকষানন্দন;
কিন্তু নিজ কর্ম-ফলে মজে দুষ্টিমতি।
বিদরে হৃদয় মম ঝরিলে সে কথা,
মহেশ্বর! হয়, দেবি, দেবে কি মানবে,
কোথা হেন সাধ্য রোধে প্রাক্তনের গতি?
পাঠাও কামেরে, উমা, দেবেন্দ্র সমীপে।
সত্বরে যাইতে তারে আদেশ, মহেশি,
মায়াদেবি-নিকেতনে। মায়ার প্রসাদে,
বধিবে লক্ষ্মণ শূর মেঘনাদ শূরে।”

চলি গেলা মীনধ্বজ, নীড় ছাড়ি উড়ে
বিহঙ্গম-রাজ যথা, মুহুর্তু চাহি
সে সুখ-সদন পানে! ঘন রাশি রাশি
স্বর্ণবর্ণ, সুবাসিত বাস শ্বাসি ঘন,
বরষি প্রসূনাসার—কমল, কুমুদী,
মালতী, সৈঁউতি, জাতি, পারিজাত-আদি
মন্দ-সমীরণ-প্রিয়া—ঘিরিল চৌদিকে
দেবদেব মহাদেবে মহাদেবী সহ।

দ্বিরদ-রদ-নির্মিত হৈমময় দ্বারে।
দাঁড়াইলা বিধুমুখী মদন-মোহিনী,
অশ্রুময় আঁখি, আহা! পতির বিহনে!
হেন কালে মধু-সখা উতরিলা তথা।
অমনি পসারি বাহু, উল্লাসে মম্বথ
আলিঙ্গন-পাশে বাঁধি, তুষিলা ললনে
প্রেমালাপে। শূখাইল অশ্রুবিন্দু, যথা
শিশির-নীরের বিন্দু শতদল-দলে,
দরশন দিলে ভানু উদয়-শিখরে।
পাই প্রাণ-ধনে ধনী, মুখে মুখ দিয়া,

(সরস বসন্তকালে সারী শুক যথা)
কহিলেন প্রিয়-ভাষে; “বাঁচালে দাসীরে
আশু আসি তার পাশে, হে রতি-রঞ্জন!
কত যে ভাবিতেছিঁনু, কহিব কাহারে?
বামদেব নামে, নাথ, সদা, কাঁপি আমি,
স্মরি পূর্ব-কথা যত! দুরন্ত হিংসক
শূলপাণি! যেও না গো আর তাঁর কাছে,
মোর কিরে প্রাণেশ্বর!” সুমধুর হাসে
উত্তরিলা পঞ্চশর; “ছায়ার আশ্রমে,
কে কবে ভাঙ্কর-করে ডরায়, সুন্দরি!
চল এবে যাই যথা দেবকুল-পতি।”

সুবর্ণ-আসনে যথা বসেন বাসব,
উতরি মম্বথ তথা, নিবেদিলা নমি
বারতা। আরোহি রথে দেবরাজ রথী
চলি গেলা দ্রতগতি মায়ার সদনে।
অগ্নিময় তেজঃ বাজী ধাইল অম্বরে,
অকম্প চামর শিরে; গভীর নির্ঘোষে
ঘোষিল রথের চক্র, চূর্ণি মেঘদলে।

কত ক্ষণে সহস্রাঙ্ক উতরিলা বলী
যথা বিরাজেন মায়া। ত্যজি রথ-বরে,
সুরকুল-রথীবর পশিলা দেউলে।
কত যে দেখিলা দেবকর পারে বর্ণিতে?
সৌর-খরতর-কর-জাল-সঙ্কলিত
আভাময় স্বর্ণাসনে বসি কুহকিনী
শক্তীশ্বরী। কর-জোড়ে বাসব প্রণমি
কহিলা; “আশীষ দাসে, বিশ্ব-বিমোহিনি!”
আশীষি সুধিলা দেবী;—“কহ, কি কারণে,
গতি হেথা আজি তব, অদিতি-নন্দন?”

উত্তরিলে দেবপতি;— “শিবের আদেশে,
 মহামায়া, আসিয়াছে তোমার সদনে।
 কহ দাসে, কি কৌশলে সৌমিত্রি জিনিবে
 দশানন-পুত্রে কালি? তোমার প্রসাদে
 (কহিলেন বিরূপাক্ষ) ঘোরতর রণে
 নাশিবে লক্ষ্মণ শূর মেঘনাদ শূরে।”

ক্ষণ কাল চিন্তি দেবী কহিলা বাসবে,—
 “দুরন্ত তারকাসুর, সুর-কুল-পতি,
 কাড়ি নিল স্বর্গ যবে তোমায় বিমুখি
 সমরে, কৃপিকা-কুল-বল্লভ সেনানী,
 পার্বতীর গর্ভে জন্ম লভিলা তৎকালে।
 বধিতে দানব-রাজে সাজাইলা বীরে
 আপনি বৃষভ-ধ্বজ, সৃজি রুদ্র-তেজে
 অস্ত্রে। এই দেখ, দেব, ফলক, মন্ডিত
 সুবর্ণে, ওই যে অসি, নিবাসে উহাতে
 আপনি কৃতান্ত, ওই দেখ, সুনাসীর,
 ভয়ঙ্কর তুণীরে, অক্ষয়, পূর্ণ শরে,
 বিষাকর ফণী-পূর্ণ নাগ-লোক যথা।
 ওই দেখ ধনুঃ, দেব!” কহিলা হাসিয়া,
 হেরি সে ধনুর কান্তি, শচীকান্ত বলী,
 “কি ছার ইহার কাছে দাসের এ ধনুঃ
 রত্নময়! দিবাকর-পরিধি যেমতি,
 জ্বলিছে ফলক-বর ধাঁধিয়া নয়নে।
 অগ্নিশিখাসম অসি মহাতেজস্বর।
 হেন তুণ আর, মাতঃ, আছে কি জগতে?”
 “শুন দেব।”(কহিলেন পুনঃ মায়াদেবী)
 “ওইসব অস্ত্রবলে, নাশিলা তারকে
 ষড়ানন। ওই সব অস্ত্রবলে, বলি,
 মেঘনাদ-মৃত্যু, সত্য কহিনু তোমারে।
 কিন্তু হেন বীর নাই এ তিন ভুবনে,
 দেব কি মানব, ন্যায়যুদ্ধে যে বধিবে
 রাবণেরে। প্রের তুমি অস্ত্র রামানুজে,

আপনি যাইব আমি কালি লক্ষাপুরে,
 রক্ষিব লক্ষ্মণে, দেব, রাক্ষস-সংগ্রামে।
 যাও চলি সুর-দেশে, সুরদল-নিধি।
 ফুল-কুল সখী উষা যখন খুলিবে
 পূর্বাশার হেমদ্বারে পঙ্ককর দিয়া
 কালি, তব চির-ত্রাস,বীরেন্দ্রকেশরী
 ইন্দ্রজিত-ত্রাস-হীন করিবে তোমারে—
 লক্ষ্মণের পঙ্কজ-রবি যাবে অস্ত্রচলে!”

মহান্দে দেব-ইন্দ্র বন্দিয়া দেবীরে,
 অস্ত্র লয়ে গেলা চলি ত্রিদশ-আলয়ে।

বসি দেব-সভাতলে কনক-আসনে
 বাসব, কহিলা শূর চিত্ররথ শূরে,—
 “যতনে লইয়া অস্ত্র, যাও মহাবলি
 স্বর্গ-লক্ষ্মণ-ধামে তুমি। সৌমিত্রি কেশরী
 মায়ার প্রসাদে দালি বধিবে সনরে
 মেঘনাদে। কেমনে, তা দিবেন কহিয়া
 মহাদেবী মায়-তারে! কহিও রাখবে,
 হে গন্ধর্ব-কুল-পতি, ত্রিদিব-নিবাসী
 মঞ্জল-আকাঙ্ক্ষী তার;পার্বতী আপনি আজি।
 অভয় প্রদান তারে করিও সুমতি!
 মরিলে রাবণি রণে, অবশ্য মরিবে
 রাবণ, লভিবে পুনঃ বৈদেহী সতীরে
 বৈদেহী-মনোরঞ্জন রঘুকুল-মণি।
 মোর রথে, রথীবর, আরোহণকরি
 যাও চলি। পাছে তোমা হেরি লক্ষ্মণ-পুরে
 বাধায় বিবাদ রক্ষঃ; মেঘদলে আমি’
 আদেশিব আবারিতে গগনে, ডাকিয়া
 প্রভঞ্জে, দিব আজ্ঞা ক্ষণ ছাড়ি দিতে
 বায়ুকুলে, বাহিরিয়া নাচিলে চপলা,
 দম্ভলি-গম্ভীর-নাদে পূরিব জগতে।”

প্রণমি দেবেন্দ্র-পদে, সাবধানে লয়ে
 অস্ত্রে, চলি গেলা মর্ত্যে চিত্ররথ রথী।

তবে দেব-কুল-নাথ ডাকি প্রভঞ্নে
 কহিলা, “প্রলয়-ঝড় উঠাও সস্বরে
 লঙ্কাপুরে, বায়ুপতি, শীঘ্র দেহ ছাড়ি
 কারাবন্ধ বায়ুদলে; লহ মেঘদলে;
 দ্বন্দ্ব ক্ষণ-কাল বৈরী বারি-নাথ সনে,
 নির্যোযে!” উল্লাসে দেব চলিলা অমনি,
 ভাঙিলে শৃঙ্খল লক্ষ্মী কেশরী যেমতি,
 যথায় তিমিরাগারে বৃদ্ধ বায়ু যত
 গিরি-গর্ভে। কত দূরে শুনিলা পবন
 ঘোর কোলাহলে; গিরি (দেখিলা) লড়িছে
 অন্তরিত পরাক্রমে, অসমর্থ যেন
 রোধিতে প্রবল বায়ু আপনার বলে।
 শিলাময় দ্বার দেব খুলিলা পরশে।
 হুহুঙ্কারি বায়ুকুল বাহিরিল বেগে
 যথা অম্বরশি, যবে ভাঙে আচম্বিতে
 জাঙাল! কাঁপিল মহী; গর্জিল জলধি!
 তুঙ্গ-শৃঙ্গধরাকারে তরঙ্গ-আবলী
 কল্লোলিল, বায়ু-সঙ্গে রণরঙ্গে মাতি।
 ধাইল চৌদিকে মন্দ্রে জীমূত; হাসিল
 ক্ষণপ্রভা; কড়মড়ে নাদিল দম্ভোলি।
 পলাইল তারানাথ তারাদলে লয়ে।
 ছাইল লঙ্কায় মেঘ, পাবক উগরি
 রাশি রাশি; বনে বৃক্ষ পড়িল উপড়ি
 মড়মড়ে; মহাবড়ি বহিল আকাশে।
 বর্ষিল আসার যেন সৃষ্টি ডুবাইতে
 প্রলয়ে। বৃষ্টিল শিলা তড়তড়তড়ে।
 পশিল আতঙ্কে রক্ষঃ যে যাহার ঘরে।
 যথায় শিবির মাঝে বিরাজেন বলী
 রাঘবেন্দ্র, আচম্বিতে উতরিলা রথী
 চিত্ররথ, দিবাকর যেন অংশুমালী,
 রাজ-আভরণ দেহে! শোভে কটিদেশে
 সারসন, রাশি-চক্র-সম তেজোরশি,

ঝোলে তাহে অসিবর—বল বল বলে!
 কেমনে বর্ণিবে কবি দেব-তুণ, ধনুঃ,
 চর্ম, বর্ম, শূল, সৌর-কিরীটের আভা
 স্বর্ণময়ী? দৈববিভা ধাঁধিল নয়নে
 স্বর্গীয় সৌরভে দেশ পুরিল সহসা।

সসভমে প্রণমিয়া, দেবদূত-পদে
 রঘুবর, জিজ্ঞাসিলা, “হে ত্রিদিববাসি,
 ত্রিদিব ব্যতীত, আহা, কোন্ দেশ সাজে
 এহেন মহিমা, রূপে?—কেন হেথা আজি,
 নন্দনকানন ত্যজি, কহ এ দাসেরে?
 নাহি স্বর্গাসন, দেব, কি দিব বসিতে?
 তবে যদি কৃপা, প্রভু, থাকে দাস প্রতি,
 পাদ্য, অর্ঘ্য লয়ে বসো এই কুশাসনে।
 ভিখারী রাঘব হয়।” আশীষিয়া রথী
 কুশাসনে বসি তবে কহিলা সুরে,—

“চিত্ররথ নাম মম, শুন দাশরথি;
 চির-অনুচর আমি সেবি অহরহঃ
 দেবেন্দ্রে, গন্ধর্বকুল আমার অধীনে।
 আইনু এ পুরে আমি ইন্দ্রের আদেশে।
 তোমার মঞ্জলাকাঙ্ক্ষী দেবকুল সহ
 দেবেশ। এই যে অস্ত্র দেখিছ নৃমণি,
 দিয়াছেন পাঠাইয়া তোমার অনুজে
 দেবরাজ। আবির্ভাবি মায়া মহাদেবী
 প্রভাতে, দিবেন কহি, কি কৌশলে কালি
 নাশিবে লক্ষ্মণ শূর মেঘনাদ শূরে।
 দেবকুল-প্রিয় তুমি, রঘুকুল-মণি।
 সুপ্রসন্ন তব প্রতি আপনি অভয়া!”

কহিলা রঘুনন্দন; “আনন্দ-সাগরে
 ভাসিনু, গন্ধর্বশ্রেষ্ঠ, এ শুব সংবাদে।
 কৃতজ্ঞতা? এই কথা জিজ্ঞাসি তোমারে।”

হাসিয়া কহিলা দূত; “শুন, রঘুমণি,
দেব প্রতি কৃতজ্ঞতা, দরিদ্র-পালন,
ইন্দ্রিয়-দমন, ধর্মপথে সদা গতি,
নিত্য সত্য-দেবী-সেবা; চন্দন, কুসুম,
নৈবেদ্য, কৌষিক বস্ত্র আদি বলি যত,
অবহেলা করে দেব, দাতা যে যদ্যপি
অসৎ! এ সার কথা কহিনু তোমারে!”

প্রণমিলা রামচন্দ্র; আশীষিয়া রথী
চিত্ররথ, দেবরথে গেলা দেবপুরে।
থামিল তুমুল ঝড়, শান্তিলা জলাধি;
হেরিয়া শশাঙ্কপুনঃ তারাদল সহ,
হাসিল কনকলঙ্কা। তরল সলিলে
পশি, কৌমুদিনী পুনঃ অবগাহে দেহ
রজোময়; কুমুদিনী হাসিল কৌতুকে।
আইল ধাইয়া পুনঃ রণ-ক্ষেত্রে, শিবা
শবাহারী; পালে পালে গৃধিনী, শকুনী,
পিশাচ। রাক্ষসদল বাহিরিল পুনঃ
ভীম-প্রহরন-ধারী—মত্ত বীরমদে।

ইতি শ্রীমেঘনাদবধে কাব্যে অন্তরাভো নাম দ্বিতীয়ঃ
সর্গঃ।

বাংলা থেকে রোমান হরফ, কাগজে:

অমিতা ভট্টাচার্য্য



কাগজ থেকে হার্ড-ডিস্ক



সংযুক্তা কাঁহার

<http://www.iopb.res.in/~somen/madhu.html>
[email:somen@iopb.res.in](mailto:somen@iopb.res.in)
